

# HASTAHANA

## OTVORENO PISMO NAČELNIKU OPĆINE CENTAR

**Nedžad Ajnadžić, načelnik**

U Otvorenom pismu od 22. novembra ove godine ponovo ste se oglušili o vrlo jasnu poruku ljudi Sarajeva, koja glasi: **u parku Hastahana nema gradnje.**

**Novi koncept parka može biti samo da se park konačno uredi na cijeloj svojoj površini kao park i kao park redovno održava.**

Do sada važeći Regulacioni plan, kojim je predviđena zgrada u samom centru parka, ljudi Marindvora i cijelog Sarajeva su prije godinu dana odbacili - stotine njih, samo iz MZ Marindvor-Crni vrh, potpisale su peticiju protiv gradnje. I tada ste dobili jasnu i odlučnu poruku da ljudima treba park.

- Pokrenuli ste proceduru Izmjena i dopuna Regulacionog plana, ali ste i novi koncept osmislili kao da prethodne reakcije ljudi nije bilo. Tačnije, kao da ne postoje ljudi iz ove opštine i grada, koji svojim radom plaćaju vašu platu i pune budžet kojim vi raspolazete, i kao da ti ljudi nemaju pravo da za svoj novac iz budžeta zadovoljavaju potrebe svoje lokalne zajednice. **Vaš 'novi' koncept je bar dvije decenije star koncept u ovom gradu - predviđa da se na još jedan od malobrojnih preostalih slobodnih prostora umjesto drveća posadi zgrada, beton i kafana.**
- Tribinu za prezentaciju koncepta ste sazvali u radno vrijeme, protivno ne samo duhu demokratije i lokalne samouprave, nego i pravilima elementarnog uvažavanja onih zahvaljujući čijem radu već godinama primete redovnu mjesečnu platu - kao kantonalni ministar, direktor javnog preduzeća, potom kao predsjedavajući Opštinskog vijeća i sada kao načelnik. Uprkos tome pojavio se ogroman broj ljudi, vrlo dobro obaviještenih i ni slučajno spremnih da budu pasivna publika.
- Protivno vašim obavezama kao službenika građanstva opštine, međutim, vi se niste pojavili na vlastitoj tribini, ali to vam je od izbora na načelničku poziciju već uobičajena praksa, pa vas zadnje dvije godine nikako ne vidamo ni na predstavljanju nacрта opštinskog budžeta. Na tribinu ste poslali tek izaslanike koji su optužili prisutno građanstvo da je skovalo urotu. Nakon što se u opštini godinama rasprodavalo i gradilo po diktatu stranačkih građevinskih i drugih klanova, vjerujemo da ljudi, koji se udruže da bi odlučno štitili opšti interes svoje lokalne zajednice, djeluju kao urotnici onima koji svoje lične interese ostvaruju nauštrb upravo tih ljudi i tog opšteg interesa.
- Takvo iskrivljavanje stvarnosti, radi privatnih ciljeva lobija, ne mijenja činjenicu da su ljudi na toj tribini, na temelju veoma argumentovane diskusije, vrlo jasno rekli: **ni centimetra parka za beton i bilo kakve građevine.**

Da ne biste bili u zabludi te dalje insistirali na privatizaciji javne diskusije tako što zaključke skupa nastojite obezvrjediti prikazujući ih kao rezultat ličnih preferenci Savjeta MZ, pokušaćemo vam izložiti suštinu našeg stava i odluka:

- Izmjene i dopune Regulacionog plana su istinska konstanta sjednica Opštinskog vijeća. Slobodnih javnih prostora, svima dostupnih, sve je manje, a na sve strane buja bjesomučna gradnja stambeno-poslovnih objekata. **Namjena tih učestalih promjena Regulacionog plana stoga je nesumnjiva: radi se o rasprodaji grada koji postaje poligon za građevinske mešetare i špekulante nekretninama, bez ikakvog uvažavanja potreba ljudi koji u tom gradu žive. Hastahana bi trebala biti najnoviji plijen u toj igri s našim životima.**

- Nama ne morate ukazivati na "loše sadašnje stanje Hastahane, situaciju u kojoj najmanje ima zelenila i gdje najveći dio predstavlja betonska ploha." **Takvo stanje Hastahane nije produkt elementarne nepogode niti naše nesavjesnosti, već sistemske politike opštinskih vlasti. Javna dobra, naročito prostori, namjerno se zapuštaju da bi se onda stanovništvu sugerisalo da se nešto mora učiniti a da za to nešto nema novca, pa se mora dati privatniku na raspolaganje.**

Svjesni ove strategije, moramo podsjetiti na neumoljive cifre. Preko pola miliona KM, našeg novca iz našeg budžeta, svake godine ide u KJKP Park. Sasvim dovoljno da se bar ovo malo parkova održava u pristojnom stanju - dočim parkovi nikad gore nisu izgledali.

Opštinski budžet zadnjih godina kreće se oko 40 miliona KM našeg novca - uvjereni smo da se sredstava za uljudbu parka Hastahana mogu naći, baš kao što se našlo gotovo 400 hiljade KM za čuveni trotoar i 1,4 miliona KM za popločavanje trga ispred Narodnog pozorišta. **Jasno nam je naravno da opsesija betoniranjem nije pitanje estetskih preferenci no činjenice da sadnja trava i drveća nisu tako tenderski atraktivne operacije, ali to više nismo spremni trpiti.**

- Naglašavate da je u parku Hastahana planirana društvena infrastruktura. Riječ društveno odavno nismo čuli od vlasti, štaviše - konstantno se negira postojanje društvenog i insistira na značaju privatnih investicija. U ovom slučaju pominjanje je direktna posljedica naše pobune protiv vaših namjera. Smatrate da će nas se lakše pridobiti ako se gradnja predstavi kao društvena. **Mi međutim ne zaboravljamo koliko nam je društvene infrastrukture prethodnih decenija oteto naknadnim preinakama namjene, a da se nas ništa nije pitalo: restituisane su školske zgrade bez uporišta u zakonu; preuzimani su domovi kulture i u kafane pretvarani; iznajmljuju se prijeko potrebni javni vrtići u razne privatne svrhe i sl.**

- Pozivate se na nisku spratnost predviđene gradnje kao osobitu prednost koncepta. Spratnost je u politici naših opštinskih vlasti najelastičnija kategorija. Budući da gotovo svakodnevno gledamo kako se uduplavaju inicijalno planirani spratovi novogradnje, prinuđeni smo da vam ne vjerujemo na riječ i da se grčevito branimo od svake cigle, svjesni da tehnički dokumenti graditelje ni na koji način ne obavezuju dok god jednostavna opštinska odluka garantuje ispunjenje svih njihovih želja.

- Hastahana je park. Hastahana ne treba da ima "više drveća i parkovske površine" - Hastahana mora biti park na cijeloj svojoj površini, jer je Sarajevo dovedeno u situaciju da ima svega jedan i po (1,5) posto površine pod zelenilom. To nije volja ljudi koji ovdje žive, ma za koga da glasaju, nego svjesne politike vlasti koja otima javna dobra i rasprodaje komad po komad grada kao da je u pitanju građevinski plac.

Smatramo da nakon ovog pisma nema više mjesta ni nervoznoj prepisci ni nedoumicama s vaše strane: **NA HASTAHANI NE MOŽE BITI GRADNJE.**

Tražimo park koji izgleda kao park i služi nam kao park na cijeloj svojoj površini. Na vama je da nam to omogućite procedurom Izmjena i dopuna Regulacionog plana, bez daljnjih prikazivanja kojekakvih rezervnih koncepata "na najbolji vizuelni način" i bez cjenkanja oko veličine zgrada.

**Pozdravljamo vas našim lokalnim pozdravom: NEMA GRADNJE - PARK NARODU!**

---

ZA: Jedan grad, jedna borba

U Sarajevu, 29. novembra 2018. godine

Dostava:

- naslov
- Karolina Karačić, predsjedavajuća Općinskog vijeća
- Savjet MZ Marindvor - Crni vrh
- arhiva